

摘藻堂四庫全書薈要

史部

欽定四庫全書薈要卷七千九百九十六

史部

硃批諭旨卷九十八

硃批潘之善奏摺

雍正四年六月十五日署理四川提督印務川北

總兵官臣潘之善謹

奏為奏

聞事竊臣准川陝總督臣岳鍾琪調撥漢土官兵前赴

冕山駐劄預備勦撫金格等蠻一案業經臣繕疏

題報在案查官兵起程行裝在所必需臣會商撫臣
法敏於司庫領支秋季餉銀散給兵丁自行製備
又借支本年冬季錢糧散給各兵養贍家口以免
內顧無不感激

聖恩樂於用命惟土兵雖稱効順非如漢兵素食名糧
可比臣與撫臣會議所給口糧之外再加賞賚以
鼓其氣除撫臣另行預備外臣隨於川省鎮協各
營存留公費銀兩內動用備辦已於調遣土兵之

已諭

法敏寬裕措備矣

時將紬緞布疋烟茶等物賞給頭目去訖其各土

兵到建昌之時及凱旋後賞賚等物該臣會同撫臣料理設備隨後差員解赴建昌宣布

聖主恩賚分別賞給庶土兵各戴

皇上隆恩踴躍從事當有實效矣至金格等蠻原係小醜不恭大兵一到仰仗

天威伊等自應傾心歸化無煩再為添兵但臣謂建昌環處萬山之中賊蠻種類不一若不預備兵馬恐

一時有用調遣不及隨檄行各營及各處土兵再
派漢兵一千名土兵一千名以備調遣臣職司軍
旅不能不為萬一之慮理合繕摺奏

聞謹

奏

凡事寧使備而不用所慮甚當殊屬可嘉之至向來但
知爾之漢仗膽量未料爾有如此才情也勉之

雍正四年九月二十二日調補陝西安西總兵官

臣潘之善謹

奏為叩謝

天恩恭繳

硃批事雍正四年八月初五日途次鳳縣地方遇臣前
差四川提標千總捧到

硃批諭旨臣跪讀之下感懼交深伏念臣一介武夫才
識淺陋荷蒙

聖主殊恩畀以重鎮兼署提篆任大責重臣夙夜冰兢

惟慮不克勝任隕越滋咎雖勉竭愚誠未敢信為
允協乃蒙

溫旨格外褒嘉臣何人斯叨受

寵渥如此其極惟有竭盡駑駘恪供職守以報

隆恩於萬一耳理合繕摺叩謝

天恩並繳

硃批謹

奏

初設要鎮諸凡營務均係創始況策妄阿拉布坦狡猾非常心志莫定一切須竭力勉為之

雍正四年十一月初九日陝西安西總兵官臣潘之善謹

奏為奏

聞事竊臣蒙

皇上殊遇調補安西總兵官於本年十月十二日抵任視事查閱川陝總督臣岳鍾琪條奏安西事宜內

如移築城池安設官兵以及屯田安戶等件無非
仰體

聖心慎重邊防規模宏遠至詳且備祇為地方起見不
暇計及費用錢糧之多寡也臣到任伊始凡臣標
各營及所屬地方事宜雖未能周知而畧觀其大
槩有應費錢糧者有應減省錢糧者有費錢糧甚
多而於地方恐無裨益者有費錢糧無幾而實於
地方大有功效者臣今逐一酌量其於地方事宜

有可以設法措置者臣當以錢糧為重而斷不肯
耗費於無用之地若地方及營伍事宜有必用錢
糧始得寧謐者臣又以地方為重而斷不敢博節
省錢糧之名此中籌畫臣陸續相機斟酌俟有確
見容臣咨商督提二臣會疏請

旨以便遵行至口外地方遼瀾隘口最多若不預設卡
路保無賊夷乘虛窺伺少有疎虞關係匪輕臣查
本年七月初六日靖逆將軍臣富寧安因大兵撤

袁繼蔭乃偏裨中之優者

回飭行駐防哈密副將袁繼蔭等已設新舊卡路

大小共八處固不星羅棋布哨探緊嚴矣惟是沙

州之西南伊孫插漢赤落兔並插漢烏素腦兒去

西寧撥住索諾木達什所住之柴達木約有千里

其間并無夷人住牧遊巡卡路臣思此二處最為

險要若不防範新設之地俱無接應矣再查沙州

去伊孫插漢赤落兔口子并麻鞋戈必口子八百

餘里實係策妄賊人偷來要路況今又值隆冬戈

必正是落雪之時誠恐夷人乘隙前來有失堵禦
臣罪難辭臣因先飭令沙州駐防遊擊派把總一
員帶兵六十名前往哨探伊孫插漢赤落兔蹤跡
沿途暫留目兵安設臺站防備傳遞緊急之信又
查沙州東南四百餘里地名插漢烏素腦兒係哨
探阿羅衣且并麻鞋鹽池戈必二口子接連柴達
木來路又東行三百餘里係烏喇打班空濶地方
亦是柴達木來路恐有賊夷潛藏臣亦派本標官



兵五十名前去在插漢烏素腦兒哨探又在烏喇打班哨探臣愚又以阿魯巴魯固及色爾騰二處應安住牧熟夷三百家西哨伊孫插漢赤落兔南哨麻鞋戈必口子自此至彼相去不過四百里易於更番巡探又插漢烏素腦兒并烏喇打班二處應安住牧熟夷三百家西南哨阿羅衣且麻鞋戈必口子南哨鹽池戈必口子接連柴達木地方路口東哨烏喇打班口外如此則熟夷哨探於外官

兵接應於內少有聲息遞相傳報首尾接應一舉可擒此無事則以夷防夷而有事則以夷攻夷之道也除將前由咨商督提二臣會議

題請外合先繕摺具

奏伏祈

皇上睿鑒施行謹

奏

爾原係朕極賞鑒之人今果不謬矣所奏可嘉之至朕

欣悅覽焉勉之

同日又

奏為恭請

聖安仰祈

睿鑒事竊臣自本年正月內

陛辭以來孺慕之私時切依戀兼以一年之中叨荷

殊恩不一而足緣臣職守極邊不能匍匐叩

闕仰瞻

天顏專差臣標把總齋摺代叩

聖安并進香水梨汁四瓶梨乾一匣伏祈

皇上叱存少備採用庶犬馬戀

主之心得稍伸於萬一矣為此謹

奏

前經有旨不令爾等總兵進獻況爾在邊外新設苦寒
地方何乃齋進梨汁等物朕嘉汝之誠勉為存留嗣後
不可

雍正五年四月十八日陝西安西總兵官臣潘之

善謹

奏為奏

聞事雍正五年四月初三日准

欽差理藩院員外郎臣盛柱駐防哈密涼州鎮臣袁繼

蔭等密咨內開為移知事雍正五年閏三月二十

六日謹將哈密喀倫必留免夷情公同會議繕清

字密摺具

奏外擬合將清字密摺譯出漢字粘單一紙移咨貴
鎮查照等因密咨到臣臣接咨之後將臣標官兵
不時勤加操演馬匹加意餵養臙壯所需軍實現
在設法製辦暗挑馬步精兵二千名預備相機聲
援第安西新設要鎮百凡創始一切營制尚需整
飭尤可慮者兵馬錢糧按季赴蘭關領動需數月
此在安常處順可以從容少待若遇倉卒調遣之
際未免緩不濟事臣愚仰懇

聖恩俯念邊陲重地將每年兵餉預先撥貯肅州道庫
無事則按季關領支放有事則就近可備軍需庶
往返不致遲悞而緩急均為有濟矣臣為邊疆要
務不揣愚昧妄陳如臣言可採伏祈

皇上睿鑒施行謹

奏

所奏是極甚屬可嘉此兵餉一事朕既未思及而料理
籌議諸臣亦皆忽畧矣候另降旨諭部

雍正五年八月二十五日臣馬爾泰臣汪隆臣潘之善謹

奏為奏

聞事竊臣等奉

命辦理城工事務自五月初一日啟土興工即派在工員弁分督夫役築基造城并採辦木石磚灰等項緣杜爾伯特地方土厚質潤所築城垣甚屬堅固各員弁俱勤於督工上緊築造目今鎮城土垣已

經築完鼓樓亦築成臺基其餘樓臺衙署營房現在陸續建造惟城垣包磚一項工程浩大恐一時天冷土凍須俟明春和暖之時方敢動土置立窰座所燒石灰極其細膩磚瓦亦甚堅厚與內地無異足備城垣之用臣等凜遵彈心竭力為之不可少有疎懈訓旨工程務期堅固可垂久遠至匠夫等每月給與工價口糧食用充足莫不感戴

皇恩踴躍趨事茲當城垣造完尚須開濬城壕夫役數

千人齊向臣等口稟我等蒙

皇恩賞給米麵口糧又給工價今開壕一事不過數日

工程我等情願出力不敢再領工價口糧臣等雖

自應仍行照數賞給仍照例給發銀糧但邊土愚民一片感激之心出

於至誠不敢不為陳

奏再今年嘉峪關外秋成甚好安西沙州等處收穫
甚多合并奏

聞謹

奏

覽奏秋收情形朕懷深慰

雍正五年九月初六日陝西安西總兵官臣潘之
善謹

奏為邊地初開禾稼咸登進呈

御覽以慰

宸衷事竊照安西新闢巖疆兵民初集臣仰沐

皇恩調茲重鎮抵任後隨親歷所轄地方考察氣候閱

看土脈內有沙州新城兩處水甘土肥臣於本年
春夏之交試種麥稻糜穀芝麻高粱棉花各種盡
皆秀實且幹莖顆粒較之腹裏地方無異現在居
民以次開墾將見數年以後盡成沃壤但向來塞
外嚴寒所種皆小麥青稞今我

皇上仁風惠澤廣被遐陬以致天時應序地氣和暢初
試五穀即獲豐登臣謹採各種穗頭籽粒并土產
枸杞潔置瓜乾稻米二色恭呈

御覽仰祈

皇上睿鑒謹

奏

據奏安西地氣和暢禾稼咸登朕欣覽之

同日又

奏為奏

聞事竊照安西新輯民戶因各處道路遙遠恐一時到
遲有誤春耕臣於正月間即為料理預備代種隨

請商督臣岳鍾琪蒙檄令將雍正三四兩年舊屯
熟地盡行播種俟戶民到日交給經管臣查舊屯
熟地一萬四千餘畝止可種籽種一千四百餘石
不足二千四百戶民食用是以飭令兵丁再開生
地一萬五千餘畝共種籽種三千石又因屯田牛
驟止三百有餘不敷應用若俟請領勢必遲延不
及是以撥給營馬六百匹其犁抄下籽薈鋤灌溉
盡屬兵丁之力至戶民於閏三月二十五日起至

四月內陸續到沙者僅七百三十戶無處居住即將兵房撥給但為數不足不能逐戶安插臣令措設帳房聊蔽風雨急催砍伐木植修葺房屋於六月初一日起陸續又到五百四十四戶正值天氣暑熱蚊蠓肆毒原帶牲口多有損傷又兼更換水土不能赴沙因撥給安西兵房暫為居住其續到之一百四十九戶又因安西兵房缺少留住柳溝時屆西成之期蒙督臣檄令將屯種地畝每戶按

二石有餘籽種之地分給令戶民自為收穫臣屢
催地方官俾令盡數赴田奈已到沙州者砍木托
坯蓋造房屋而暫住安西柳溝者實因家口拖累
及患疾病不能前往臣見戶民渙散催促不前復
令兵丁代為收穫今督臣檄令分田原為休息兵
丁之計但戶民零星散處顧此失彼不能赴田緣
由督臣遠駐省城未得周知臣思田苗分給戶民
勢必致悞收穫是以督令兵丁同撥出戶民合力

公收今已割麥百餘萬綑約估獲糧二萬二千餘石現在接食俟今冬碾打完畢得見確數另行奏聞仍照二石有餘籽種所獲之糧再為分給再查未到之民與損傷牲口之家來春耕作以今歲較之無遲悞之虞臣以此情節咨明督撫商酌料理訖伏思安西地方新闢我

皇上動費帑金招集民戶其田地農具房屋等項雖已經料理但安插之計總在地方官隨時相機籌畫

不致失所方於

國計民生兩有裨益今職司民牧者但知循習舊規
即事涉微小亦必請示督撫動經數月遲悞之處
皆由此弊臣受

恩深重不敢緘默伏祈

皇上簡任賢員前來專任料理庶邊末愚氓得被
洪庥於靡既矣為此繕摺奏

聞仰祈

皇上睿鑒施行謹

奏

諸凡料理甚屬妥協如是方為實心任事朕深嘉之凡
百咸能似此據實不隱封疆大臣中更屬難得勉之勉
之

雍正五年十一月初八日陝西安西總兵官臣潘
之善謹

奏為奏

聞事竊查臣標馬匹往年於十月初一日在於本城地方收槽餵養因今歲城工興作車輛駝隻雇寬不敷所需草束拽運艱難是以臣令將馬二百零五匹飭委臣標中營把總李良策在於靖逆營之頭道溝地方就草餵養忽於本年十月二十九日據駐防柳溝堡守備報稱本月二十九日有中營兵丁金必等趕馬飲水忽有達子七名從紅柳窩內閃出各執器械前來趕馬將兵丁衣服剝去隨後

沙窩裏又閃出達子二十餘名將馬匹接替竟趕往東北去了把總李良策帶兵前去追趕守備亦即派撥弁兵星速跟蹤追趕等因到臣臣於本日晚得信即差守備馬進榮把總胡發等帶兵二百名並飭靖赤二營各派兵丁尋蹤追趕即具文呈明督臣岳鍾琪提臣宋可進肅州鎮臣楊長泰在案茲據跟隨把總李良策之兵丁華貴等報稱從布魯墩湖灘花海子等四處共尋獲馬一百一十

五匹尚少馬九十匹又據前差把總胡發報稱馬
守備於十一月初一日進追至鹹泉子見賊夷飛
奔前往遂帶兵飛追前去先有把總張文元等追
至馬鬃山打班賊與官兵彼此放鎗見後邊又有
官兵到來隨即退去官兵趕過打班有四十里之
地賊夷又添十數名在沿山放鎗打仗一次天晚
賊夷退去初三日兵分三起趕至一百六七十里
趕上賊夷又在沿山放鎗官兵直追前去亂山之

中忽然又添賊夷一百餘人將官兵圍住放鎗馬
守備帶領弁兵上前放鎗攻打多時天色已晚賊
夷退去馬守備收兵歇息住劄差把總前來回話
據此隨問你們可知此項賊夷是誰家的達子稟
稱俱戴著黑白羊羔皮卧兔帽子穿著好像西海
上的達子內中亦有穿綿甲的等情據此臣愚料
此項賊夷若是厄魯特並未帶有高裝帽子況噶
爾旦策楞新近差人進

貢請

安未必就敢起釁恐係土木扎薩去年七月內從西海
分領夷人帶赴北套去的臣聞得內有馬匹乏弱
留住哈密之探納慶養馬被札薩額敏逐趕起身
前往北套恐伊等仍潛藏亂山之中以打牲為名
潛至境內乘隙偷趕馬匹臣查此項留住窮夷至
多不過二百餘名因官兵追急故敢迎敵料此必
無重大事情理應無煩

聖慮但又查向來在卜隆吉住牧之阿拉布坦八素台

同羅卜藏丹津一時投策妄阿拉布坦今聞得伊
在遼邊住牧恐因策妄阿拉布坦病故之後乘隙
由巴爾庫爾土胡魯前來妄生事端均未可定除
本月初六日派兵一百五十名復令把總胡發帶
往金鈎碇應援追踪訖臣惟恐賊勢重大復派右
營遊擊陳進福選精兵五百名預備停當一面飭
令守備馬進榮相機尾追前去若至土胡魯地方

賊勢果重查土胡魯一帶與哈密相近臣即飛咨督提二臣並肅鎮外即帶領兵丁會同駐防哈密涼州鎮臣袁繼蔭協同勦殺再為具本

題報事關邊徼夷情合先具摺奏

聞再查賊夷潛至境內汛防官弁並餽馬弁員漫無知覺其疎防之罪實所難逭俟追賊官兵回營之日臣查明確實另為

題叅伏祈

皇上睿鑒施行謹

奏

宋可進亦經奏聞此風何可滋長亟當悉心籌計務窮蹤跡朕意或恐羅卜藏丹津勾引準噶爾夷賊前來生事起釁亦未可知料青海夷人未必敢如是妄行也

同日又

奏為奏

聞事竊臣於本年三月內因沙州戶民到遲恐屯種有

誤臣隨商請督臣岳鍾琪派撥臣標兵丁一千五百名代為開荒墾種籽種三千石秋收刈獲麥細一百二萬有零經臣具摺

奏明今於十月二十八日據經理屯田遊擊陳進福報稱場事完畢共計碾打京石麥二萬四千三百餘石除還過籽種三千石屯田兵丁加增口糧九百石外尚有麥糧二萬四百餘石俱盤交沙州衛倉存貯按月支給戶民口糧查沙州原議安插戶

民二千四百戶今現到一千四百二十三戶營兵
所收糧石足敷戶民明歲一年食用尚有未到九
百七十七戶若於明春正二月起發到沙長途遠
涉牲口乏弱恐不能及時耕種徒費口糧是以臣
等詳明督臣請將未到之戶俱於來年交秋起身
於八月內到沙不但牲口可免倒斃即所食口糧
亦可節省半年有餘又不至妨彼蓋房之工再督
臣以沙州安插戶民如何於

國帑無虧如何於民生有益如何於農事無誤令臣
會同肅州道齊式漢興道尤汶確議等因臣即公
議九條呈覆訖謹將原議九條錄呈

御覽更有請者安西新設邊鎮各處地土多未開墾成
熟出產無多臣標馬匹上槽餵養所需料豆俱係
赴甘糴買因甘肅收成少歉較之去歲價值昂貴
況明歲城工正在興作食指殷繁恐甘肅等處仍
遇歉薄採買輓運必致多費錢糧有關

國帑臣仰體

皇上勸諭開荒至意再三曉示據各兵內有子弟呈報
情願認地墾種者准作該丁恒產仍令照例陞科
外但查各兵家口先搬接到安者僅三百餘家餘
丁不過百十餘名臣酌議明春仍量撥營兵帶領
現在之餘丁在於新城地方公種一千餘石籽種
沙州協標亦有餘丁令在沙公種五百石籽種秋
收之後糧食存貯公所若遇糧價昂貴之時並緊

急需用之處支給兵食庶邊疆有備貯之糧兵丁
免缺食之虞臣愚昧之見是否有當伏祈

皇上睿鑒施行謹

奏

覽奏俱悉一應戶民屯種等務統宜咨商岳鍾琪定議
辦理朕不便批諭當否凡事不可參差必內外畫一方
能妥協

雍正六年二月二十二日陝西安西總兵官臣潘

之善謹

奏為奏明躡獲賊蹤事竊照臣標就草餵養馬匹於
雍正五年十月二十九日被賊偷趕二百零五匹
責差臣標右營守備馬進榮領兵追趕緣由節經
奏明於雍正六年正月三十日據臣前差分途躡探
賊蹤通事魏漢奇王朝宰等稟稱奉差緝賊自肅
州起身由坤都倫押斯兔一掏兔一帶到巴濟公
住牧的扎會海必爾漢地方躡見蹤跡將番文投

給阿亥台吉據云賊已拏住給有文書令小的等
先來報信他們討將軍吩咐然後差人送賊等語
據此臣隨將來文譯出細繹文內情由並面質差
來投文之副都統噶爾架等俱有隨後送賊之語
但等候十餘日並未解送前來正在復差通事魏
漢奇等持文前赴北套巴濟公之弟阿亥台吉處
討取賊夷間於二月十三日准振武將軍咨內開
賊已拏獲一十二名解送軍營一一勘明偷馬情

由咨請內部訖等因臣查金鈎砮打仗之後據守
備馬進榮差把總胡發等報稱賊夷百十餘人今
准咨稱賊夷一十二名與原報打仗之數目大相
懸殊今振武將軍止據賊夷供稱偷馬情由並不
知與我官兵打仗之事既稱咨請內部應聽部審
具

奏所有前差追賊守備馬進榮帶領官兵已於二月
十六日檄調回營外至賊夷果否多寡之處臣責

差把總朱祿通事魏漢奇併前與賊打仗報信之
通事王孝等同振武將軍差人藍翎侍衛策客及
副都統都噶爾架等前往打仗之所驗看交蹤前
赴振武將軍處與巴濟公之弟達什達爾架公併
阿亥台吉面質賊夷多寡數目訖臣謹將躡獲蹤
跡緣由繕摺奏

聞謹

奏

夷賊盜馬情事已明晰矣

雍正六年六月二十九日臣馬爾泰臣汪滌臣潘
之善謹

奏為奏

聞事竊臣等奉

命辦理安西城工事務自雍正五年五月初一日興工
築土建造於八月內已築成城垣其包磚一項於
雍正六年六月內亦已全完堅固整齊足垂久遠

再黃墩踏實雙塔百齊惠回五處堡城先後俱於
六月內築完臣等伏思

皇上軫念邊陲特發帑金新建城堡大工今當鎮城包
磚全完各堡城築造齊備理合繕摺奏

聞^好

至於各項營造如城樓廟宇衙署兵房倉廩墩臺一
切工務合鎮城與沙州五堡總計其工程已有十
分之七約九月內大工可以告竣臣等謹先將鎮
城包磚全完五堡城垣已建緣由奏

聞仰祈

皇上睿鑒謹

奏

各項工程總期堅實完好倘少不如法寧可拆改重修
切勿草率苟且務圖垂久為一勞永逸之計今日此奏
非異時無據之事也慎為之

雍正六年八月二十四日陝西安西總兵官臣潘
之善謹

奏為恭謝

天恩並繳

硃批事竊臣齋摺把總回署恭捧

硃批奏摺二件

皇輿圖十卷藥錠一匣到臣臣恭設香案望

闕叩頭謝

恩領受訖伏念臣邊末武夫聞見未廣茲蒙

皇上頒發輿圖臣盥手開閱具見

皇輿廣大巨細不遺聲教所加遐荒備載矣至藥錠捧到時適值瘟疫流行臣即仰體

宸衷分發標協營路暨哈密等處文武官弁並兵民人等依方調治全愈甚多感戴歡呼聲溢四境所有微臣領受輿圖藥錠感激下悃理合繕摺奏

謝並繳

硃批謹

奏

據奏藥錠分發官弁兵民調治全愈朕欣悅覽之今歲
時氣甚廣幸蒙

天恩溥佑所染皆輕愈者亦速

同日又

奏為奏

聞事竊臣查得達麻林色布騰住牧之蘓賴地方出產
硫磺離臣屬靖逆營約五百餘里聞得夷人向來
取用臣隨差人採獲現在燒成數千斤甚屬精細

又鎮城迤北二百餘里地名白芨芨南面有鉛山一座向日有人開採臣亦差人燒成鉛斤其色類白似有銀汁但邊人技拙不能爐分無從辨認再石包城以南去鎮城六百餘里之一肯薩喇哈爾金山內每年四月間冰消地解有無藉民人潛往彼處刨掘黃沙臣恐姦民雜處滋生事端是以選差弁目入山驅逐第南山一帶地方遼濶雖勞兵億馬終難禁絕臣思金分三品皆天地寶物或因

皇上廣開疆宇洩發各礦以助

國帑亦未可知臣智識短淺未能灼見仰請

皇上遣一幹員前來認試倘可採用似應任人開挖計
牀抽稅所有鉛斤命人分燒如果山川效靈不惟
國賦有增亦與新設巖疆不無小補矣今臣虔封硫
磺鉛斤並購買新金恭呈

御覽是否可採伏祈

皇上睿鑒施行謹

奏

此事與督臣岳鍾琪商酌奏聞

雍正六年九月二十五日臣馬爾泰臣汪滌臣潘之善謹

奏為城工告成事竊臣等奉

命辦理安西各處城堡工務前因鎮城包磚全固各堡城垣築成業經繕摺具

奏今鎮城及沙州五堡各處城樓廟宇衙署兵房倉

殿并原題新設沿邊一十三處墩臺院牆兵房大小共一萬二千四百餘間一切工程於九月內俱已全完理合恭摺奏

聞伏查臣等原先會同估計共約需銀二十八萬餘兩自興工後於燒造石灰磚瓦採取木植石條等物隨時籌算不使曠工糜費較原估工數少用四十餘萬人工即少用銀四萬餘兩其輓運各項物料應用腳價又多方節慎亦少用銀數萬餘兩通計

鎮城沙州五堡墩臺一切工程共用銀止在二十萬兩以內現今安西及涼甘二府存貯餘銀并用剩物料變價銀兩合計共有九萬兩零再預備支給匠夫所買口糧米麵剩有五千餘石亦實值銀一萬餘兩臣馬爾泰臣汪滢現在清查各工用過銀兩細數繪畫城堡圖樣繕造進

呈用過錢糧物料清冊并將所剩銀兩移交臣潘之善同經管收發城工錢糧肅州道齊式暨涼甘二

府知府等解交蘭州司庫所剩米麵已交明安西
沙州地方廳衛等官存倉變價還項臣馬爾泰臣
汪澂俟各項料理清楚即起程赴京為此具摺奏
聞謹

奏

安西各項城堡工務汝等辦理甚屬可嘉不待此奏朕
於他處業俱聞之

雍正六年十一月初六日陝西安西總兵官臣潘

之善謹

奏為恭繪新設輿圖進呈

御覽事竊臣邊未武夫恭膺

簡命調補安西重鎮倘於內外境況不能周知何能彈
壓斯土撫中禦外以紓

宸衷西顧之殷因思臣足跡不能遍歷惟於目覩耳聞
之餘細加查詢留心校正今臣自揣地理情形頗
悉毫末隨命畫工繪成全圖臣復挨次考核未敢

謂竟無錯謬然亦或可自信於十分之一耳除將
圖冊由督臣岳鍾琪送部備查外合將輿圖敬用
黃裱差臣標把總齎捧進呈

御覽伏祈

皇上睿鑒謹

奏

輿圖留中詳覽足見爾留心地理情形朕深為嘉悅

雍正七年二月十二日陝西安西總兵官臣潘之

善謹

奏為奏

聞事竊臣於雍正六年夏秋之間眼疾復發安西地處邊末並無明醫療治日加障蔽蒙

皇上天恩遣發太醫馳驛前來於本年二月初七日到安臣隨出郊躬迎跪請

聖安太醫口傳

諭旨云總兵若欲在安西調理即仍住本處若欲回內

地著醫官一路用心看視同回內地調理欽此臣伏聽

諭旨望

闕叩謝至

賜臣尋骨風藥酒醫士臣沈宏霖送赴臣署臣九叩跪
受訖隨即與臣診視脈理據云臣心血大虧腎經
有損肝風太旺上焦屬火下源屬寒體厚多痰恐
將來成中風之證臣聞醫士之言始悟眼目之受

病有由來也今蒙

御賜尋骨風藥酒日飲兩次兼服湯劑覺疾涎稍減腰
腿痛止夜間添睡藥力之妙漸服漸效但目翳雖
較前微退而全愈須待時日若能保養心血火降
水升則目疾可以全愈矣茲先將臣受病之由並
醫士抵安之日繕摺奏

聞謹

奏

據奏服藥有效朕懷稍慰務宜安心調理朕深望汝之
全愈也切勿性急徐徐攝養自然收功

雍正七年三月初八日陝西安西總兵官臣潘之
善謹

奏為奏明事竊查安西標協營路額設馬步兵丁共
六千五百名所恃以壯

國威而禦外患者軍裝為先臣於抵任之後隨點閱
各兵不惟新經招募者全無軍裝即告住裁撥者

俱係出征多年所執器械不堪應用旗幟號衣俱
皆舊損鍋帳等物亦屬缺乏臣與官兵商議設法
製辦嗣奉

欽頒通融銀二萬兩以此轉移那借差委弁員前赴西
安地方製造旗幟撒袋弓箭腰刀鞍韉號衣等項
分散各兵乃係本身佩帶之物俱皆出於情願而
通融銀兩於領餉時還項至於鳥鎗一項臣遵奉
部咨照依沿邊沿海之例每兵一千名設鳥鎗四

百桿已經撥解足額又添造先鋒鳥鎗一百二十
桿以備行走所需守護城池如宣威連珠馬腿行
營各礮位已咨督提二臣現在請撥備用再火藥
一項為軍中緊要之物隨於雍正五年內咨請督
提二臣於甘涼肅三鎮撥解一萬五千斤於雍正
六年方始解足臣又於安西本處開局製火藥八
千斤有奇暫敷應用鑼鍋帳房係督臣岳鍾琪於
甘肅撥解五百頂副聊為備用其餘尚需製造今

臣查安西標路各兵器械已覺鋒利鮮明當茲城
堡告竣兵馬分駐已定正當親率將備等官時加
操練務知有勇知方以紓

皇上西顧之殷少寬臣罪愆於萬一詎臣眼疾復發宿
病侵尋蒙

皇上賞銀遣醫容臣調理今興漢鎮臣曹勳已經抵任
臣將兵馬營汛各項事宜交代接管另疏

題報外所有臣製辦過軍裝情由理合繕摺奏

聞謹

奏

覽奏知道了務期加意調治痊愈以副朕望

雍正七年四月二十七日原任安西總兵官臣潘
之善謹

奏為恭謝

天恩事竊臣目患殘疾過蒙

皇恩遣發太醫馳驛前來與臣調治臣自服

御賜尋骨風藥酒及甘露左歸二飲冰臘丸等藥效驗如神兩月之間雜證全愈即雙目雲翳漸服漸退正在繕摺奏謝間於四月十一日蒙

皇上重念微臣復遣太醫院眼科施世德到卜隆吉臣出郊跪請

聖安醫員口宣

諭旨臣即望

闕叩頭謝

恩感激之私涕零寤寐惟仰體

宸衷恪遵

諭旨善加調養以副

聖主眷念之至意嗣醫士臣沈宏霖施世德同與臣診
脈看目僉云心腎不足血虛火盛以致迎風流淚
白翳遮精左目重右目輕仍用尋骨風藥酒日飲
二次兼服滋腎養肝退翳湯疏經應痛丸並點光
明膏不半月之間精神舒暢身體强健今右目雲

翳已經全退視物分明左目亦退十之六七不過
稍覺羞明仰賴

皇仁不待月餘必獲全痊此皆我

皇上天地父母之恩生成育養之所致也臣惟有刻骨

鏤心誓圖報效以仰答

高厚於萬一耳謹此繕摺恭謝

天恩謹

奏

所奏欣悅覽之夙疾頓除目昏復明實屬可嘉之事更加盡力調養平復如初以慰朕念

雍正七年五月十二日原任安西總兵官臣潘之
善謹

奏為臣病全痊懇請隨征仰祈

俞允事竊臣一介武夫荷蒙

皇上鴻慈擢任總兵調補安西地方任重責鉅不敢稍有懈弛致厪

聖慮何敢以微末殘疾漬干

天聽但臣前患眼疾雙目障蔽自謂五官已缺其一殘廢之軀不能仰報

天恩矣隨於雍正六年十二月間具本請休乃過邀皇上隆恩疊遣太醫馳驛診視日服

御藥效驗如神不數月之間俾一身之雜證頓除即雙目雲翳已經退斂枯朽回春復見天日殘喘餘生皆我

皇上之所賜也今臣筋力精神自覺倍常技藝騎射宛如平昔竊臣病痊之日正

天威遠震之時普天率土內外臣工凡有見聞者莫不鼓掌稱慶踴躍爭先況臣受

恩深重矢報靡遑寧能安居田園終老林下伏祈

皇上允臣隨征効力疆場倘獲寸功庶犬馬微忱少報高天厚地之恩於萬一耳為此具摺懇請伏乞

皇上乾斷施行謹

奏

覽奏深為慰悅醫官為何未具奏帖病果全愈朕自另有諭旨隨征効力之請不必

雍正七年七月二十四日原任安西總兵官臣潘之善謹

奏為恭謝

天恩事竊臣殘軀弱質雙目翳蔽自謂不能復愈荷蒙聖主天地再造之恩連遣太醫與臣醫治今臣仰藉

皇仁雙目明朗殘病全無頻受

洪恩有加無已即粉身碎骨不能仰報

高厚於萬一於本年五月十二日業已具摺懇請隨征
俾得効力疆場少舒犬馬下悃恭候

諭旨遵行茲醫士臣沈宏霖施世德於七月二十四日
起身回京復

命所有微臣感激

天恩下忱謹繕摺恭

謝伏祈

皇上睿鑒謹

奏

朕之欣慰筆不能宣此實

上天

聖祖復賜朕干城良將也隨征之請前已有旨不必汝病
既痊候朕另降諭旨

雍正七年八月二十八日原任安西總兵官臣潘

之善謹

奏為奏謝

天恩恭繳

硃批事雍正七年七月二十九日據臣差家丁齎捧
硃批奏摺并

恩賜錦扇香袋藥錠等件到臣臣謹望

闕叩頭謝

恩訖伏念臣一介駑駘至愚至陋荷蒙

皇上格外殊恩有加無已

錫予頻施誠人臣之

殊遇臣愧無涓埃報效惟有刻骨銘心永矢不諠而已
所有感激下悃理合奏

謝並繳

硃批奏摺伏祈

皇上睿鑒謹

奏

朕有旨命汝署理固原提督印務矣此任乃汝叔祖潘
育龍之所整理為天下第一營伍其流風餘韻至今猶
屬可觀茲若不能企及何顏以對朕耶但汝叔祖之操
守斷不可倣效一二必棄其所短而法其所長則汝可
謂一全材勝如汝叔祖之人物矣勉之

雍正七年十一月二十四日署理陝西固原提督
臣潘之善謹

奏為恭謝

天恩併繳

硃批事竊臣奉

命前赴固原署理提督印務於雍正七年十月初八日
途次請逆地方遇臣前差家丁捧到

硃批奏摺暨

尚方嘉珍兼口傳

諭旨臣於旅舍敬謹九叩謝

恩祇領訖伏思臣本樗櫟庸材仰叨

聖訓擬以干城良將返衷自問愧歎益深更蒙

隆恩憫念臣實窮苦出內庫以酬醫士

賜奇品以資微臣即臣愚賤家丁統邀

聖賞浩蕩洪恩無微不至此誠千古之異數格外之

鴻慈也臣即捐糜頂踵亦不能仰報萬一理合繕摺叩

謝

覽奏謝矣
天恩併繳

硃批再臣於奉文之日拮据就道於一月間可到固原

緣臣途次甘州偶患項癰沿途療治以致遲延時
日於十一月二十日抵任至臣之癰疾仰託

聖主福庇今已全痊合併

奏明伏祈

皇上睿鑒謹

奏

據奏偶患項癰已愈朕思汝目疾之後發出小毒係屬
有益之事詢據醫官所論與朕意合因將伊等奏帖一

併發來爾看果如此則病根永除矣

聞袁繼蔭嗜酒廢弛營務又將汝所請備用銀兩任意
借與兵丁果然否新設邊鎮甚屬緊要且諸凡規制悉
係汝所創建假若稍有回護瞻徇負恩莫此為甚據實
奏聞以便決定去留

署安西總兵官印務涼州總兵官臣袁繼蔭謹
奏為恭懇

聖恩憫念窮兵准開官當以濟緩急事竊臣伏見

皇上特恩憫念在京八旗兵丁若有一時需用無所
取辦

特給內庫銀兩令王大臣等營運生息以備兵丁一
時之用並外省駐防之滿洲漢軍兵丁與各省
督撫提各標亦一體加

恩至於各省鎮標兵丁亦將次第加

恩陸續降

旨此誠

皇上至聖至明仁恩週遍愛養兵丁之盛心也臣見

安西新設巖疆土無出產百物價值數倍內地
兵丁衣食較為艱苦其日用緩急不無藉於典
質但口外並無富商大賈納稅開當之家不過
闌闌小民押物求息其貲本既微則取利必重
竟有每兩一月之息多至三錢者窮兵以物押
錢數月之後利大於本以致日用愈為困苦臣
稔知其弊業經會同地方官曉諭禁約毋得違

禁取利但前此闕闕之民因本少利微不肯當
押在窮兵緩急無濟日用仍為拮据臣庫貯雖
現有通融銀兩然兵丁朝夕所需其數甚微若
零碎借給煩瑣非體臣伏思

上諭有鎮標兵丁次第加息之

旨安西前蒙

皇上發有庫貯通融銀共六萬兩內四萬兩必奏
聞始敢動用至二萬兩為平時通融之用奉

旨不必具奏而此二萬兩內除哈密存貯二千兩臣
庫現貯一萬八千兩臣請於此內動支三千兩
開設官當舖內地當舖例每兩每月三分起息
擇民人中老年成歷練者令其經管量給工食其
每月所有利息謹仰體

皇上恩旨以賞給兵丁之家大事需用庶極邊汎地
緩急常通無重利之苦有周濟之益矣是否允
協出自

皇上特恩非臣所敢擅便為此繕摺

奏請伏乞

皇上睿鑒施行謹

奏

據袁繼蔭有此一奏發來爾看豈伊欲掩飾前非而謀
為此舉耶抑或地方情形果應如是辦理耶爾其據實
抒情奏聞以便朕加斟酌

雍正八年正月二十七日署理陝西固原提督臣

潘之善謹

奏為遵

旨實陳事雍正八年正月十五日臣捧讀

皇上硃批署安西總兵官袁繼蔭奏摺蒙

恩以開設當舖應否如是辦理下詢微臣並荷

特旨以袁繼蔭嗜酒廢弛營務將備用錢糧任意借與

兵丁著臣據實奏

聞臣欽遵查得安西係新設嚴疆兵丁居其六七游食

與貿易之民居其二三其中原有私開小押之家
取利頗重兵丁不無受累袁繼蔭條奏開設當舖
亦屬實心為裨益兵丁起見但未思及開設當舖
此舉似可行之暫時已允伊所請矣
民人無幾勢必取利於兵丁夫兵丁之家衣服器
械而外有何長物堪以質當無論三分即以一分
之息取諸兵丁其與我

皇上賞賚無已之隆恩似稍相左此目前之當舖不宜
開也臣愚竊以管窺冒瀆陳請仰懇

皇上俯念邊末或發生息銀若干兩交與甘州提督並
爾此見與朕原欲如恩各鎮標之意相同現在降旨詢
甘山道招商營運輻輳之區易於生息亦堪繼久
問各鎮俟伊等覆到自另有諭
是否允協

洪恩出自

聖裁臣未敢擅便也袁繼蔭在西寧並署涼州鎮時臣
曾聞酒量甚大自到安西但聞小飲未聞其有沉
酒之事臣不敢懸擬具

奏至於廢弛營伍借用錢糧其情形原有相肖之跡

安西正值軍興兵丁不時差遣凡遇一切牛羊馬
駝糧餉俱用撥兵運送存營無幾是以停其操練
似近廢弛再安西營務動需銀兩乃能措辦但通
融一項有可動用者有不可動用者必須籌畫周
詳方為慎重袁繼蔭與兵丁借用銀兩雖係因公
截支究不無過用之處此任意之咎在所難辭其
借用過數目督臣查郎阿現在訪察
借用過款項臣未悉確數謹將臣在卜隆吉養病
時所聞大槩臚列六款另摺恭呈

御覽外理合據實覆

奏伏祈

皇上睿鑒施行謹

奏

覽所奏殊屬公當

同日又

奏為欽遵

聖訓事竊臣齋摺家丁回固臣跪讀

殊批諭旨荷蒙

聖訓勉臣操守臣日夜兢惕寧敢復蹈前轍有負我

皇上委任至意訓練兵馬係武臣職分但臣細閱固原

營伍自臣叔祖鎮綏將軍臣潘育龍之後兵卒尚

何消

爾言仍屬天下第一營伍

屬可觀其盔甲旗幟鳥鎗以及鍋帳諸色軍器則

俱舊損臣查詢其故實係臣叔祖在日設立軍庫

凡一應鉛藥器具皆有存蓄故當前次兵興之際
用之不乏自康熙五十九年軍庫失火所藏軍器

鉛藥毀壞無遺兼之陝提一缺自康熙五十八年
至雍正四年曾易八九人大半又多署事俱未及
詳加料理即前任提臣路振揚畧為補葺又經二
次出兵亦多損傷目今存營軍器俱應修飾補造
至鳥鎗尤屬要務臣現擬整頓製辦第因營中公
費於去歲供應軍前使用尚在不敷前提臣路振
揚

奏明閒項銀兩俱經營中動用今祇存二百餘金不

足措辦除臣現在設法料理外倘銀兩有不敷之處當另奏請

旨遵行事關營伍臣不敢隱匿為此謹

奏

是

雍正九年四月初九日原任署理固原提督臣潘之善謹

奏為

皇恩高厚臣病難醫披陳下悃仰祈

睿鑒事竊臣材本庸鄙更患殘疾蒙我

皇上洪恩賜醫隨任醫治正月內復蒙

諭旨令臣暫行解任調理臣經恭疏謝

恩並太醫院吏目臣沈宏寀施世德具摺請

旨三月內太醫口稱奉

硃批諭旨令再竭力醫治臣老疾纏綿自八年十月至

今調理半載太醫等俱各竭力盡心調治奈臣目

病根深已成痼疾有非藥力所可收功者伏思臣
世受

國恩涓埃未效值此

明良盛會竟以殘廢退閒不克與士卒効力疆場時
為踧踖再有臣前署固原提督仰沐

聖恩賜臣養廉銀二千兩業於本年正月二十七解任
之日住支訖臣未效寸長素餐

天祿心殊惶悚茲臣閒散安逸更荷

御醫每日診視在伊等雖不責臣之供給而過煩

天使日逐周旋臣自愧疎慢又不敢送其回京午夜悚
懼寢食不寧謹披陳下悃仰祈


睿鑒謹

奏

如可以來京二醫一路同來倘或艱於行動不能前來
隨汝之便可也



硃批諭旨卷九十八



總校官庶吉士臣侍朝

校對官編修臣莫瞻菴

謄錄監生臣周翥華

欽定四庫全書薈要

史部

硃批諭旨卷

九十九至
一百二

詳校官編修臣繆晉

欽定四庫全書薈要卷七千九百九十七

史部

硃批諭旨卷九十九

硃批張璨奏摺



雍正七年七月初四日直隸按察使臣張璨謹
奏為請嚴跌錢之禁以重

國寶以清賭具事竊臣以一介庸愚荷蒙

皇上不次擢用畀以直隸刑名重任

洪恩異數欲報無能凡欽奉

諭旨嚴禁事理惟有實力奉行留心稽查以冀仰副
聖天子移風易俗之至意伏查賭博一事

定例甚嚴其牌骰等件固已久經嚴禁而跌錢一項
其風日熾將錢擲地以決勝負所賭輸贏盈千累
百竟不減於牌骰是跌錢之禁不嚴則賭具終不
能清而賭風亦終不能息況跌錢一項且足為影
射牌骰之具蓋有本係鬪牌擲骰一經發覺惟恐
追究賭具而詐稱跌錢者亦有地方官畏失察賭

具處分并借跌錢之名巧為開脫者種種流弊不可勝言矧錢文乃係

國寶而輒敢用為賭具以相嬉戲其為不敬罪莫大焉臣愚以為欲除其弊必嚴其罪請嗣後如有跌錢賭博者將出錢之人與開場放頭併同賭者照牌骰之例加等治罪其地方官不力行查拏漫無覺察者亦照失察牌骰賭博之例加倍議處地方牌甲人等一體嚴加治罪如此則愚民咸知

國寶為重不敢輕棄而賭具之流弊亦可遏絕矣是
否有當伏乞

皇上敕部議覆施行謹

奏

舉凡賭博等事既角勝負即有輸贏無不為利起見然
牌骰等具製造精良原可藉以遣興消閒不特市井販
豎為之士大夫亦往往樂此不為疲所以其風易熾至
於擲錢之戲不過博徒不能頓改舊習暫為之技耳久

之自當止息況賭法豈僅此擲錢一項倘禁此而愚不肖輩復創設他法以相娛嬉勢又不得不禁則是禁歟愈多而賭具無窮究竟何所底止耶汝等地方大員但當禁絕牌骰足矣何必又及其餘此皆輕本重末之舉朕甚不取果能實力奉行牌骰二事令行禁止勸導愚頑革心向善則此一二擲錢棍徒只用數張告條保其當下停止設地方平時禁不止令不行縱由部頒條約千百言仍屬有名無實徒滋紛擾於事亦復何濟若謂

擲錢為輕褻國寶更屬鄙論朕惟以賢臣為寶餘無可
寶者錢文雖係國寶乃民間日用之物居常繫之腰膝
之間藏之席褥之下皆莫得而禁焉又安可以不敬之
罪罪之乎據汝又云地方有司因畏失察賭具處分借
跌錢之名巧為開脫等語尤為可笑若然則汝之不能
察吏顯然自首矣識見甚屬平庸亟當奮勉學習以期
無玷官箴況擲錢之戲雖未奉旨明飭一切賭具未嘗
不容汝等禁遏也當禁者汝等自可申飭屬員奉行何

庸具奏煩瀆

雍正八年三月二十三日湖南按察使臣張璨謹

奏為據實回奏事竊臣荷蒙

皇恩調任湖南按察使欽奉

皇上面諭令臣將許英賢一案秉公研究臣於到任後

查人犯已經移解江西檢閱卷宗因許英賢等在

永順散毛茅岡等司地方假張天師名色賣藥行
醫蹤跡可疑辰沅靖道王柔恐係匪類拏獲嚴究

供出張易珍等為匪令伊等在外施藥并夥黨姓名請咨各省緝拏續又拘獲許世基等到案并咨查江西覆無張易珍名目經前任按察使郭朝祚研訊許英賢等堅供從前實係畏刑妄供並無為匪情事隨經詳請前撫臣王國棟將該犯等咨解江西原籍收管去後嗣經雲南獲解江自得即江子德等四川獲解江子文等及雲南續解江東景等福建獲解王霖等并據郴州拏解朱金有等隨

經撫臣趙宏恩咨提江西許英賢等到案發審總計三十一名隨即會同布政司逐一隔別細加研訊據許英賢等堅供實係在外行醫恐無人見信遂假天師名色賣藥冀圖獲利並無為匪情事再三研鞫堅不招承迨嚴加刑訊又極口稱冤及提許英賢所供之江自得質訊亦供實係行醫賣藥為生詰其供吐因何彼此脗合據供雲南係執湖南來咨推究故爾照伊混供並非實情再四究詰

矢口不移臣思大案全憑證據今審該犯等謀為不軌之處毫無確實搜檢行李又無別物似難懸擬以大逆之罪可否將許英賢等遞回原籍著落該犯戶族嚴加收管不許出外滋事臣知識淺陋未敢擅便業經將該犯等所供與各省咨覆情由備敘轉解撫臣覆審外理合將臣等審過緣由先行具摺奏

聞謹

奏

閱爾審訊情節與朕原諭相符滇省所取之供脗合若
此安得不行根究既無確據照所奏發落可也然不可
因此案子虛遂爾於究察匪類等處懈忽從事勉為之

殊批諭旨卷九十九

欽定四庫全書薈要卷七千九百九十八

史部

硃批諭旨卷一百

硃批鄭任鑰奏摺

雍正四年五月初四日湖北巡撫臣鄭任鑰謹

奏為奏

聞事臣以庸陋下材荷蒙

皇上殊恩畀以封疆重任一切事宜惟有謹遵

聖訓夙夜勤慎以期稍盡職守臣於雍正四年三月十

二日入境即見沿路二麥暢茂到任之後行查各屬據報雨水霑足二麥豐收等語現在收穫統計分數約有七八九十分不等米石時價武昌漢陽二府每石八錢五分黃州安陸德安荊州襄陽鄖陽六府每石自七錢二三分至八九錢一兩不等小麥每石五錢五六分至六錢大麥每石二錢六七分三錢不等收成豐稔編氓樂業此皆

皇上宵旰勤求保民若赤之所致也至各處早稻俱已

播種將畢雨水現在調勻所有二麥收成及米麥
時價謹具摺奏

聞伏乞

睿鑒謹

奏

二麥豐收米價平減殊慰朕懷千里如面不可粉飾覽
督撫二臣之奏似出一手或偶爾相符亦未可定倘係
商酌約同之言則過費一番心思矣此後不必約同一

人獨奏可也

同日又

奏為奏

聞事竊查湖北地方時當初夏江漢水勢正在日加增

長臣恐有妨堤岸已嚴飭武昌守道趙宏恩上荆

南道高淳下荆南道趙之均等令於各所屬堤堰

在爾

固然嚴飭恐屬員實力奉行者鮮矣若勸懲不公

用心巡察督率印河各官加意防守務保無虞再

舉劾

不明此等皆屬故套紙上虛文耳何益之有必使

所屬城垣間有殘損之處臣已飭令地方官及時

地方各官振起向來疲玩積習為要

修葺完固有因明季兵燹城已剝為平地幸有山

徐徐為之總期克臻實效

險可恃者臣已行令查勘缺口用磚石填砌添設

定界

一事必使確乎不易方為畛域清楚寧可稍遲畫

準毋

得草率從事否則不特為無益之更張且恐為日

後爭

端之伏脈翻成可笑之舉也

訖間有犬牙錯雜之地與濱江濱湖坍漲不時之

處尚未勘明界限俟勘明具報到日倘有接壤之

區其間有可以便民併隸者容臣查確具疏請

旨遵行更有私鑄一事現在嚴行禁止務期源絕流清

至於安民必先察吏臣於到任後已嚴飭各員勉力振作以肅吏治如再有疲玩不職者臣即分別糾叅人地不相宜者臣即

題請調換以上俱臣分內應行事件不應上煩

聖聽現在次第料理恐塵

聖懷理合奏

聞謹

奏

私鑄既經嚴禁即應區畫永久可行之策而措施之庶
百姓輸心樂從也不然姦刁射利之徒煽惑愚民翻生
怨望於事何濟此正爾等封疆大吏之責當不避勞怨
熟籌謀始樂成之難易為國家盡力為之設有掣肘之
處不妨奏明毋得輒指稱特旨陡頒嚴令以致衆口譁
而於國計民生仍然無益此等居心行事豈臣下歸
功引咎之道歟諸如此類當事事留心若使怨歸於上
則恐罪歸於汝等也至於察吏泛泛申飭不如開心見

誠懃懇教導使皆竭忠盡瘁以奉公敷治則百廢俱興
矣惟宜端本不必逐末勉之勉之

所奏各項次第布置力行不間方有成效

李成龍似尚不知朕爾詳悉告之

雍正四年七月十三日湖北巡撫

臣

鄭任鑰謹

奏為恭繳

硃批事五月初四日

臣恭具

奏摺荷蒙

皇上賜覽批發到楚臣伏讀之下仰見我

皇上睿慮周詳無微不燭逐一

指示開導愚蒙使知遵守臣謹刻骨銘心凡屬地方一切事件總惟實力奉行任勞任怨至於緩急寬嚴臣當愈加小心斟酌務期得宜不敢草率以仰副聖主加惠元元砥礪臣工之至意又蒙

皇上硃批李成龍似尚不知朕爾詳悉告之欽此臣遵赴督臣李成龍衙門詳悉敬告訖再臣前奏清界

一事內稱接壤之區有可以便民併隸等語蒙

硃批此句不解欽此臣實冒昧措辭疎晦茲謹詳悉奏

明竊惟湖北地方有犬牙相錯之地與濱江濱湖
坍漲不時之洲土兩境之民多致互爭又有日久
荒棄之土為鄰境之民開墾者藉稱舊界希圖占
奪興訟臣愚以為莫非王土何分彼此倘州縣接
壤之區有此等漲淤洲土與墾熟荒地似應察民
所便酌量地之相隔州縣城池遠近如去此縣甚

遠可以歸併彼縣管隸有益者立以新界具

題請

旨定案不特賦役畫一訟爭可息而百姓可免遠赴輸
將並無推卸命盜差徭之弊矣是否有當伏乞

聖慈指示遵循所有欽奉

硃批理合恭繳謹

奏

定界以息訟端原屬善政但須畛域清析確當不可草

率從事前諭甚明今爾又復請朕指示朕思此事必得
賢能之員盡心竭力慎重周詳公平經理方足以服衆
心而止爭競於地方始為有益既云犬牙相錯則分析
甚難況濱江濱湖坍漲不時今據目前淤土定以新界
水性無常將來如或此坍彼漲又當作何區畫之處不
可不預為籌及據爾奏稱定界之後賦役畫一爭訟可
息言之似覺可聽恐行之殊不易耳當再四斟酌盡善
無弊方可措置勿因本欲便民而反致擾民也

雍正四年九月十三日湖北巡撫臣鄭任鑰謹

奏為恭繳

硃批叩謝

天恩事竊臣前奏定界一事蒙

皇上訓誨指示諄切周詳臣惟有敬謹遵循不敢草率

滋擾務期實在清楚以慰

聖懷再前臣摺奏土司清界與代繳上荆南道高淳奏
摺冒昧煩瑣輕瀆

聖聰蒙

皇上天恩不即貶黜容

臣

醒悟悔改

臣

接到大學士張

廷玉等書札詰責嚴切戒勉備至

臣

感激愧懼無

地自容自今以後惟有痛自刻責愈加恪謹竭誠

盡力以答

高厚而已

臣謹望

闕叩頭恭謝

天恩謹

奏

汝何嘗遵朕之訓誨指示以居心行事也莫負朕恩毋
忘養心殿面奏之言勉之慎之

硃批諭旨卷一百